



REPUBLIKA E SHQIPËRISË  
**AUTORITETI I KONKURENCËS**  
**KOMISIONI I KONKURENCËS**

**V E N D I M**

**Nr. 498, Datë 15.02.2018**

**“Për miratimin e Raportit Vjetor mbi veprimtarinë e Autoritetit të Konkurrencës për vitin 2017 dhe prioritetet kryesore për vitin 2018”**

Komisioni i Konkurrencës, pas shqyrtimit të materialit të paraqitur nga Sekretari i Përgjithshëm “Raporti Vjetor mbi veprimtarinë e Autoritetit të Konkurrencës për vitin 2017 dhe prioritetet kryesore për vitin 2018”, bazuar në nenin 24, shkronja (d) dhe (e), nenin 26 dhe nenin 29, pika 2, shkronja (ç) të Ligjit Nr. 9121/2003,

**VENDOSI:**

1. Miratimin e “Raporti Vjetor mbi veprimtarinë e Autoritetit të Konkurrencës për vitin 2017 dhe prioritetet kryesore për vitin 2018”, sipas tekstit që i bashkëlidhet këtij vendimi.

Ky vendim hyn në fuqi menjëherë.

**KOMISIONI I KONKURENCËS**

# RAPORTI VJETOR 2017

*Prioritetet e Institucionit për vitin 2018*

Përmbledhje Ekzekutive





*Në besojmë se **konkurrenca** e lirë përbën një nga shtyllat e **rëndësishme** në ekonomi, që rrit eficiencën e tregjeve dhe për rrjedhim ndikon **në rritjen** e mirëqenies në terma afatgjatë.*



# PËRMBAJTJA

- 04 30" PËR TU NJOHUR ME AUTORITETIN
- 06 STATISTIKA
- 09 FJALA E KRYETARIT TË KOMISIONIT TË KONKURENCËS
- 10 LEGJISLACIONI SEKONDAR
- 11 TREGJET E MONITORUARA
- 13 PROCEDURAT HETIMORE
- 16 PËRQENDRIMET
- 18 TË DREJTAT EKSKLUZIVE
- 19 AK PËRBALLË PROCESIVE GJYQËSORE
- 20 ADVOKACIA E KONKURENCËS
- 21 TRANSPARENCA
- 22 BASHKËPUNIMI NDËRKOMBËTAR
- 23 INTEGRIMI EVROPIAN
- 24 KAPACITETET NJERËZORE
- 25 PRIORITETET 2018

# MISIONI

**Kontroll të  
përqendrimeve**

**Hetime të sjelljeve  
antikonkurruese**

**Vlerësime të  
të drejtave ekskluzive**

**Advokaci dhe kulturë të  
konkurrencës**

**30''**

**STATUSI**

*Organ*

*Publik i*

*Pavarur*

**5** **Komisionerë**

**39** **Punonjës**

**57**

**Ditë trajnimi  
për punonjësit**

### **20-21 prill 2017**

Trajnimi për abuzimin me poziten dominuese: Rabatet/ Uljet e kushtëzuara ,nga TAIEX.

### **27 prill 2017**

Rezoluta e Kuvendit të Shqipërisë për vlerësimin e veprimtarisë së AK për vitin 2016.

### **17 tetor 2017**

Raportimi në nënkomitetin e 9 BE-Shqipëri për tregun e brendshëm dhe konkurrencën.

### **11-12 dhjetor 2017**

Konferenca ndërkombëtare e konkurrencës.

### **20 dhjetor 2017**

Miratimi i rregullores për kategoritë e marrëveshjeve të transferimit të teknologjisë.

### **28 shkurt 2017**

Hapja e hetimit paraprak në tregun e shërbimit të ngarkim-shkarkimit dhe aktivitetet e lidhura me to, për mallrat rifuxho në Terminalin Lindor të Durrësit.

### **10 korrik 2017**

Vendimi për rrëzimin e kërkesë-padisë, me paditës EMS APO dhe të paditur AK, lënia në fuqi e vendimit të KK, nga Gjykata Administrative e Shkallës së Parë Tiranë.

### **21 shtator 2017**

Mbyllja e hetimit paraprak në tregun e shërbimeve celulare dhe dhënia e rekomandimeve për AKEP dhe KMK .

### **12 tetor 2017**

Hapja e hetimit të thelluar në tregun e shërbimit të ngarkim-shkarkimit dhe aktivitetet e lidhura me to, për mallrat rifuxho në Terminalin Lindor të Durrësit.

### **23 nëntor 2017**

Autorizimi i dy përqendrime në tregun e telefonisë celulare për transferimin e ½ të spektrit të frekuencave të Plus Communication te Vodafone Albania dhe Telekom Albania.

për tu njohur me

**AUTORITETIN**

**TË ARDHURA**

**8**

milionë Lekë


Të ardhura të realizuara nga përqendrimet

**BUXHETI**


**66.8**

milionë Lekë


Buxheti për vitin 2017




### Numri i vendimeve në vite



### Numri i rekomandimeve të dhëna mbi legjislacionin e tregjeve në bazë të neneve 69 dhe/ose 70, të ligjit nr. 9121/2003 në vite.




### Procedura hetimore në vite



Tregjet prodhuese të hetuara, gjatë vitit 2017



Tregjet joprodhuese të hetuara, gjatë vitit 2017







# FJALA E KRYETARIT TË KOMISIONIT TË KONKURRENCËS

Autoriteti i Konkurrencës gjatë vitit 2017 synoi që misioni i tij për një konkurrencë të lirë dhe efektive në treg, të ishte në funksion të zhvillimit ekonomik të vendit dhe në të mirë të të gjithë konsumatorëve. Ne besojmë se konkurrenca e lirë përbën një nga shtyllat e rëndësishme në ekonomi, që rrit eficiencën e tregjeve dhe për rrjedhim, ndikon në rritjen e mirëqenies në terma afatgjatë.

Viti 2017 është konsideruar si viti i konsolidimit të ekuilibrave ekonomikë dhe financiarë të vendit. Ekonomia shqiptare, në vitin 2017, u pozicionua e 75-ta në renditjen e indeksit global të konkurrueshmërisë (GCI), nga pozicioni i 80-të që ishte klasifikuar për vitin 2016, duke lënë pas vendet e rajonit si Serbi, Mal i Zi dhe Bosnje-Hercegovina referuar raportit më të fundit të konkurrueshmërisë, Forumi Ekonomik Global.

Vlerësohet se ekonomia po rikuperon boshllëqet e krijuara në kapacitet e saj prodhuese, duke dhënë sinjale të qarta për një gjallërim të mëtejshëm në vitin 2018. Përtej optimizmit të arsyeshëm, këto zhvillime mbartin dhe rrezikun potencial të krijimit të situatave të abuzimit me pozitën në treg, fenomene këto që mund të shfaqen në formën e një pozicioni monopolist, të një përqendrimi të madh apo në çdo lloj tjetër me efekt material në zbehjen e konkurrencës në treg.

Nga ky këndvështrim, në veprimtarinë tonë jemi munduar të jemi lojtarë pro aktivë, duke synuar identifikimin dhe parandalimin paraprak të rasteve të mundshme të abuzimit me pozitën në treg, pavarësisht natyrës apo specifikave të tyre. E gjithë kjo është mundësuar nëpërmjet një numri të madh monitorimesh dhe hetimesh përgjatë gjithë vitit të kaluar. Përtej misionit tonë parandalues, një prioritet të veçantë në veprimtarinë tonë ka zënë analiza e pandërprerë e situatës në tregjet me problematika të përsëritura, ku do doja të veçoja tregun e karburanteve, tregun e telefonisë celulare dhe atë të sigurimeve.

E gjithë veprimtaria e Autoritetit është reflektuar në vendimmarrjen e Komisionit të Konkurrencës, e cila në total numëron 47 vendime, nga të cilat 16 janë për dhënien e autorizimeve të përqendrimeve. Autoriteti ka qenë vokal në lidhje me nevojën për një sërë ndryshimesh ligjore dhe aktesh normative duke synuar në çdo rast kufizimin e akordimit me ligj të të drejtave ekskluzive apo të kufizimit të konkurrencës.

Siç e përmenda më sipër, gjatë vitit 2018 dhe në periudhën që do të pasojë atë, ekonomia do të përballet me shumë sfida dhe objektiva ambicioze. Nga ky këndvështrim, Autoriteti ka pjesën e tij të kontributeve dhe të përgjegjësisë. Ne jemi të vendosur të zbatojmë me përpikëri të gjithë kuadrin ligjor dhe atë nënligjor në fuqi për të garantuar mbrojtjen e konsumatorit nga gjithë abuzimet që mund të lindin nga deformimi i qëllimshëm apo jo i konkurrencës së lirë. Ndërkohë që ne do të vazhdojmë të jemi partnerë luajalë dhe transparentë, do të jemi shumë rigorozë dhe këmbëngulës në materializimin me objektivitet të gjithë vendimmarrjes dhe gjetjeve tona në veprimtarinë e subjekteve të prekura prej saj. Ne jemi të ndërgjegjshëm se hapat që kemi hedhur janë një pikënisje e mirë, por rruga jonë është e gjatë dhe me shumë sfida përballë një ekonomie në zhvillim.

Ajo që dua të garantoj publikun është se themelet e vendosura janë solide dhe se Autoriteti ka mundur të bëjë progres përgjatë rrjedhës së viteve. Për rrjedhim, ne jemi besimplotë se në të ardhmen hapat tona do të jenë më të sigurt. Autoriteti do të vazhdojë të jetë një institucion i bazuar në integritet, duke respektuar parimet bazë të etikës, transparencës dhe paanshmërisë. Objektiv madhor mbetet instalimi dhe përhapja e një kulture konkurrence gjithëpërfshirëse. Për këtë qëllim, ne do të jemi aktivë në promovimin e të gjithë rasteve dhe agjentëve ekonomikë, të cilët respektojnë ligjin.

Në përfundim, do të dëshiroja të bëja një falënderim të veçantë për të gjithë Komisionerët e Komisionit, përfshirë dhe ata që janë larguar në përfundim të mandatit, për përkushtimin dhe seriozitetin e tyre në përmbushjen e mandatit ligjor të tyre.

Duke ju ftuar të njiheni më në detaje me veprimtarinë e institucionit përgjatë këtij Raporti,

Ju faleminderit,

**Prof.Dr. Juliana Latifi**

# Legjislacioni sekondar

## Rregullorja “Për kategoritë e marrëveshjeve të transferimit të teknologjisë”.

Kjo rregullore është përshtatur dhe përafuar plotësisht me Rregulloren e Komisionit (BE) nr. 316/2014, datë 21 mars 2014 "Për zbatimin e nenit 101(3) të Traktatit për Funkcionimin e Bashkimit Evropian për Kategoritë e Marrëveshjeve të Transferimit të Teknologjisë".

Rregullorja e re plotëson kuadrin ligjor në fushën e konkurrencës, duke parashikuar mënyrën se si kryhet procesi i vlerësimit për kategoritë e marrëveshjeve të transferimit teknologjik.

Nëpërmjet kësaj rregulloreje, rregullohet shprehimisht që marrëveshjet e transferimit të teknologjisë, të lidhura ndërmjet dy ndërmarrjeve që lejojnë prodhimin e produkteve të kontraktuara, u njihet e drejta e përjashtimit nga kategoria e marrëveshjeve të ndaluara, me kusht që pjesa e kombinuar e palëve në treg të mos tejkalojë 20% të tregut përkatës të prekur. Në lidhje, me ndërmarrjet, palë të një marrëveshjeje, të cilat nuk janë ndërmarrje në të njëjtin treg përkatës, përjashtimi do të zbatohet me kusht që pjesa e tregut e secilës palë të mos tejkalojë 30% të tregut përkatës të prekur.



## Broshurë informuese “Programi i përputhshmërisë me rregullat e konkurrencës”

Ky dokument, bazohet në të njëjtin dokument që Komisioni Evropian ka përgatitur për komunitetin e biznesit si dhe është mbështetur në praktikat më të mira dhe të njëjtat programe, që kanë hartuar autoritete homologe apo vende anëtare të tjera të BE.

Nëpërmjet këtij dokumenti, AK synon të inkurajojë ndërmarrjet që të investojnë burimet e nevojshme njerëzore, të cilat do t'i ndihmojnë ato (ndërmarrjet) të kuptojnë sesi përputhshmëria me rregullat e konkurrencës, mund të jetë një investim fitimprurës për to dhe, si të parandalohet shkelja e rregullave të konkurrencës, duke vepruar sipas standardeve ligjore dhe etike në fushën e konkurrencës.


Ky dokument, në kuadër të “Advokacisë së konkurrencës”, u bë objekt diskutimi edhe në tryezat e të rrumbullakta të organizuara me komunitetet e biznesit, në qytetet e Fierit, Elbasanit dhe Durrësit, gjatë muajve tetor - nëntor 2017.



# Tregjet e monitoruara

Autoriteti i Konkurrencës, në zbatim të nenit 28 të ligjit nr. 9121/2003 realizon monitorime dhe analiza të tregjeve, me qëllim zhvillimin e konkurrencës së lirë dhe efektive..

Nëpërmjet monitorimeve vlerësohen elementë konkurrues siç janë: strukturat e tregut dhe dinamikat e zhvillimit të tij, sjellja e ndërmarrjeve në treg në lidhje me konkurrentët e tjerë, konsumatorët, si dhe barrierat ligjore dhe ekonomike për hyrësit e rinj në treg.



Shfaqja e filmave ne kinema

Importi & depozitim GLN



Telefonia celulare

Importi & përpunimi i kafesë



Transporti detar

Importi & shitja e cigareve



# Procedura hetimore

## Telefonia Celulare (Marrëveshje ndaluar)

KK, me vendimin nr. 461, datë 23.05.2017 vendosi hapjen procedurës së hetimit paraprak në tregun me pakicë të shërbimeve celulare. Në përfundim të hetimit, KK vendosi t'i rekomandojë AKEP:

Të njoftojë AK për çdo paketë standarde/ofertë të njoftuar nga ndërmarrjet që operojnë në tregun e telefonisë celulare që sjell efekte antikonkurruese në treg, në përmbushje të detyrimeve ligjore të përcaktuara në nenin 12, nenin 38 dhe nenin 61, të ligjit nr. 9918/2008;

Të kërkojë opinionin e AK për çdo ndryshim të strukturës së tregut që mund të sjellë pasoja për konkurrencën;

Brenda 90 ditëve nga data e hyrjes në fuqi të këtij vendimi, në bazë të nenit 70 të ligjit nr. 9121/2003, të marrë masat si vijon:

Të bëjë vlerësimin e paketave 28 ditore dhe 30 ditore për të vlerësuar nëse ka efekte negative për konsumatorin duke u shprehur me vendim të Këshillit Drejtues të AKEP;

Ndryshimin e nenit 8 të rregullores nr. 27/2012 "Mbi publikimin e informacionit për tarifën si dhe kushtet e aksesit dhe përdorimit të shërbimeve të komunikimeve elektronike publike", duke parashikuar detyrimin e ndërmarrjeve për njoftimin në AKEP përpara bërjes efektive të miratimit të tarifave/ndryshimeve;

Të përcaktojë për operatorët e shërbimit celular detyrimin, që përveç çmimit të paketës standarde nga ana e ndërmarrjeve, të publikohet dhe çmimi për njësi për çdo shërbim (lekë/min., lekë/sms, lekë/MB, etj.), që këto paketa përmbajnë;

Të parashtrojë përpara AK duke kërkuar fillimin e procedurave përkatëse ligjore për çdo rast, për të cilin konstaton sjellje antikonkurruese nga ana e ndërmarrjeve që ushtrojnë veprimtari në tregun e komunikimeve elektronike;

Të kryejë analiza për zhvillimin dhe orientimin drejt kostos së tarifave standarde të aplikuara për përdoruesit me parapagesë, që përdorin tarifën standarde jashtë ofertave për operatorët me fuqi të ndjeshme në këtë treg.

Si dhe t'i rekomandojë KMK:

Të kërkojë nga ana e operatorëve të telefonisë celulare përmbushjen e detyrimit, që për çdo ndryshim apo hedhje të paketave të reja në treg që ka efekt të drejtpërdrejtë tek konsumatori, të kërkojë transparencë çmimi për njësi për çdo shërbim të ofruar (lekë/min., lekë/sms, lekë/MB, etj.);

Ndërmarrjet që operojnë në tregun e telefonisë celulare brenda 90 ditëve nga hyrja në fuqi e këtij vendimi të marrin masa për aplikimin dhe publikimin e çmimit për njësi për çdo shërbim (lekë/min., lekë/sms, lekë/MB, etj.) që përmbajnë paketat standarde, duke informuar AK;

Monitorimin nga ana e AK të tregut me pakicë të shërbimeve celulare për një periudhë 1 (një) vjeçare, e cila fillon nga data 1 tetor 2017;

Gjatë periudhës së monitorimit ndërmarrjet që ushtrojnë veprimtari në këtë treg, duhet të njoftojnë paraprakisht pranë AK të gjitha ndryshimet e kryera në paketa standarde, oferta promovionale, tarifa standarde, etj., që do të hedhin në treg.

TREGU I SHFAQJES SË FILMAVE NË  
KINEMA NË QYTETIN E TIRANËS  
(ABUZIM ME POZITËN DOMINUESE)

KK, ME VENDIMIN NR. 466, DATË 20.06.2017  
VENDOSI HAPJEN E HETIMIT PARAPRAK NË TREGUN E  
SHFAQJES SË FILMAVE NË RRJETET E KINEMAVE NË  
QYTETIN E TIRANËS.

KK ME VENDIMIN NR. 479, DATË 26.10.2017  
VENDOSI MBYLLJEN E PROCEDURËS SË HETIMIT  
PARAPRAK DHE ME QËLLIM ANALIZIMIN E KUSHTEVE  
TË TREGUT PËR ZHVILLIMIN E KONKURRENCËS SË  
LIRË DHE EFEKTIVE NË TREG, NDËRMARRJA ME  
POZITË DOMINUESE "CINEPLEXX" SHPK, ÇDO 6 MUAJ,  
PËRKATËSISHT BRENDA DATAVE 10 PRILL DHE 10  
TETOR TË ÇDO VITI, DUHET TË DËRGOJË PRANË AK  
INFORMACION MBI ÇMIMET E SHITJES SË BILETAVE,  
KOSTOT PËRKATËSE DHE BRENDA DATËS 10 PRILL  
TË DËRGOJË NJË KOPJE TË PASQYRAVE FINANCIARE  
TË VITIT TË MËPARSHËM SË BASHKU ME SHËNIMET  
SHPJEGUESE TË PASQYRAVE ANALITIKE FINANCIARE.

# Procedura hetimore

Tregu i shërbimit të ngarkim-shkarkimit dhe aktivitet e lidhura me to për mallrat rifuxho në Terminalin Lindor të Portit të Durrësit (Abuzim me pozitën dominuese)

KK, me vendimin nr. 450, datë 28.02.2017 vendosi hapjen e procedurës së hetimit paraprak në tregun e shërbimit të ngarkim-shkarkimit dhe aktivitet e lidhura me to, për mallrat rifuxho në Terminalin Lindor të Portit të Durrësit.

Gjatë procedurës hetimore, KK vlerësoi se mund të ndodhej përballë një situatë urgjence të parashikuar në nenin 44, të ligjit nr. 9121/2003, për shkak të rrezikut të kryerjes së një dëmi të rëndë dhe të pariparueshëm për konkurrencën, pasi mund të kishte shkelje të nenit 9, të këtij ligji. Për këtë arsye, me vendimin nr. 451, datë 28.07.2017 vendosi marrjen e masave të përkohshme ndaj ndërmarrjes “EMS APO” si:

Të zbatojë në mënyrë të menjëhershme detyrimin ligjor për ofrimin e shërbimit të ngarkim-shkarkimit dhe shërbimet e lidhura me to, për të gjithë operatorët e licencuar stivadorë që ushtrojnë veprimtarinë e tyre sipas licencës;

Të lejojë aksesin e operatorëve stivadorë të licencuar në Terminalin Lindor për të kryer shërbimet ndaj klientëve;

“EMS APO” të vendosë në përdorim vinçat për të gjitha shoqëritë stivadore.

Masat e përkohshme merren për një periudhë kohore të caktuar deri në përfundim të hetimeve.

Pas përfundimit të procedurave hetimore, AK i është drejtuar Komisionit të Ekonomisë dhe Financave dhe Komisionit të Veprimtarisë Prodhuese, Tregtisë dhe Mjedisit, në Kuvendin e Shqipërisë, duke depozituar raportin hetimor të realizuar për këtë çështje, për realizimin e një seancë dëgjimore me MIE, si organi rregullator në tregun përkatës. Në përfundim të kësaj procedure, KK do të shprehet me vendim përfundimtar në lidhje me rivendosjen e konkurrencës dhe rregullimin e këtij tregu.



## Transporti ndërkombëtar detar në portin e Vlorës (Abuzim me pozitën dominuese)

KK, me vendimin nr. 455, datë 28.03.2017 vendosi hapjen e hetimit paraprak në tregun e transportit ndërkombëtar detar të udhëtarëve dhe automjeteve.

Në përfundim të procedurave hetimore, KK, me vendimin nr. 467, datë 04.07.2017 vendosi mbylljen e hetimit paraprak si dhe:

Detyrimin e ndërmarrjes “Northbay Transportes Marittimos Lda”, përfaqësuar nga “Gerverni Travel” SHPK, të zbatojë kushte të barabarta për veprime tregtare të njëjta me palët (shoqëritë e transportit rrugorë që përdorin transportin detar nga Porti i Vlorës), për të vendosur në gjëndje të favorshme konkurrence;

Monitorimin e tregut të transportit ndërkombëtar detar të udhëtarëve dhe automjeteve në Portin e Vlorës për periudhën nga data 04.07.2017 deri më 04.01.2018, me qëllim verifikimin e sjelljes së ndërmarrjes “Northbay Transportes Marittimos Lda” për zbatimin e detyrimit të vendosur, sipas pikës 1 të dispozitivit të këtij vendimi;

T’i rekomandojë MTI që bazuar në vendimin e KK nr. 349, datë 19/02/2015 “Për masat rregulluese dhe rekomandimet në tregun e transportit ndërkombëtar detar të udhëtarëve dhe automjeteve”, të realizojë:

Monitorimin e zbatimit të tarifave sipas njoftimeve dhe miratimit të MTI për secilin traget/linjë kryesisht gjatë sezonit të lartë;

Sigurimin e të dhënave të detajuara mbi të gjitha kostot reale për shërbimin që ofrojnë operatorët;

Monitorimin e mbajtjes së të dhënave ditore për tarifat e aplikuar për çdo biletë të shitur, si dhe mbajtjes së rekordeve të shitjeve të biletave nga ndërmarrjet që operojnë në treg.





# Kontrolli i përqendrimeve

## Telefonia celulare

Komisioni i Konkurrencës, me vendimin nr. 484, datë 23.11.2017 "Për Autorizimin e përqendrimit të realizuar nëpërmjet transferimit të ½ të spektrit të ndërmarrjes "Plus Communication" Sha tek "Vodafone Albania" Sha dhe vendimin nr. 485, datë 23.11.2017 "Për Autorizimin e përqendrimit të realizuar nëpërmjet transferimit të ½ të spektrit të ndërmarrjes "Plus Communication" Sha tek "Telekom Albania" Sha, vendosi :

Të autorizojë përqendrimin e realizuar nëpërmjet transferimit të ½ të spektrit të ndërmarrjes "Plus Communication" Sha tek "Vodafone Albania" SHA dhe "Plus Communication" Sha tek "Telekom Albania" Sha;

Detyrimin e AKEP për të siguruar frekuenca të lira për çdo hyrës të ri në treg;

Pas përfundimit të transferimit të spektrit, AKEP të kryejë analizën e tregut të telefonisë celulare, duke përcaktuar operatorët me fuqi të ndjeshme në treg (OFNT), sipas kërkesave të kreut VI të ligjit nr. 9918, datë 19.05.2008 "Për komunikimet elektronike në RSH", i ndryshuar. AKEP për nxitjen e konkurrencës në treg, të vendosë kushte dhe detyrime të veçanta sipas përcaktimeve të ligjit nr. 9918/2008 ndaj OFNT dhe në rast moszbatimi, ta parashtrojë rastin përpara AK;

AK të realizojë vlerësimin e tregut pas përqendrimit, mbështetur në analizën e AKEP.

## Tregu bankar

Komisioni i Konkurrencës, me vendimin nr. 474, datë 14.09.2017 "Për autorizimin e përqendrimit të realizuar nëpërmjet blerjes së disa aseteve, detyrimeve dhe marrëdhënieve ligjore të ndërmarrjes Veneto Banca "S.p.A. nga Intesa Sanpaolo S.p.A.." autorizoi përqendrimin e realizuar në tregun bankar, duke qenë se degët e këtyre bankave realizonin xhiro në tregun e brendshëm.

## Tregu i sigurimit të jetës

Komisioni i Konkurrencës, me vendimin nr. 478, datë 26.10.2017 "Për autorizimin e përqendrimit të realizuar nëpërmjet përfitimit të kontrollit mbi shitjen dhe transferimin e kuotës prej 90% të ndërmarrjes "Insig Jete" Sha, nga "Eurosig" Sha tek z. SH. K. dhe z. S. M." vendosi të autorizojë përqendrimin e realizuar në tregun e sigurimit të jetës.




## Tregu i jashtëm

Komisioni i Konkurrencës, me vendimin nr. 456, datë 28.03.2017 “Për autorizimin e përqendrimit të realizuar nëpërmjet përfutimit të kontrollit të Tobacco Press d.o.o. Mostar dhe Aseteve të Duhanit të Fabrika Duhana Sarajevo d.d. nga British American Tobacco Investments Limited” vendosi të autorizojë transaksionin. Treg përkatës në këtë transaksion u konsiderua tregu i importit dhe tregtimit të duhanit të prodhuar nëpërmjet makinerive (FMC).

Komisioni i Konkurrencës, me vendimin nr. 459, datë 25.04.2017 “Për autorizimin e përqendrimit të realizuar nëpërmjet përfutimit të kontrollit të shoqërisë Fannie May Confections Brands Inc. nga shoqëria Ferrero International S.A” vendosi të autorizojë transaksionin. Treg përkatës në këtë transaksion u konsiderua tregu i prodhimit dhe shitjes së ëmbëlsirave prej çokollate; tregu i prodhimit dhe shitjes së ëmbëlsirave në formë kremi; tregu i prodhimit dhe shitjes së ëmbëlsirave me përmbajtje qumështi dhe snacks të ëmbël dhe tregu i prodhimit dhe shitjes së ëmbëlsirave prej sheqeri.

Komisioni i Konkurrencës me vendimin nr. 463, datë 06.06.2017 “Për autorizimin e përqendrimit të realizuar nëpërmjet krijimit të një ndërmarrjeje të re të pavarur me funksione të plota ndërmjet shoqërive BMW AG / Daimler AG / Ford Motor Company / Dr.Ing. h.c.F. Porsche Aktiengesellschaft” vendosi të autorizojë transaksionin. Treg përkatës në këtë transaksion u konsiderua tregu për instalimin, operimin dhe mirëmbajtjen e një infrastrukture karikimi publike të aksesueshme për automjetet elektrike me bateri (BEV).



# Të drejtat ekskluzive

## Hetimi për abuzimin me pozitën dominuese për të drejtat ekskluzive

Gjatë vitit 2017 KK është shprehur me 3 vendime për një rast të të drejtave ekskluzive, rast për të cilin është kërkuar dhe vlerësimi nga ana e Ministrisë së Infrastrukturës dhe Energjisë.

*E drejta ekskluzive në tregun e shërbimit të ngarkim-shkarkimit dhe aktivitetet e lidhura me to për mallrat rifuxho në Terminalin Lindor të Portit të Durrësit.*

KK me vendimin nr. 450, datë 28.02.2017, vendosi: hapjen e procedurës së hetimit paraprak në tregun e shërbimit të ngarkim-shkarkimit dhe aktivitetet e lidhura me to për mallrat rifuxho në Terminalin Lindor të Portit të Durrësit, për periudhën kohore nga dita e nesërme e nënshkrimit të Kontratës Koncesionare, datë 6 Maj 2013, me objekt “Menaxhimin, operimin dhe mirëmbajtjen e Terminalin Lindor në Portin e Durrësit”, me palë “EMS Shipping & Trading GmbH” dhe MPT, deri më datë 28.02.2017.

Gjithashtu, në zbatim të detyrimeve që rrjedhin nga kontratat/licencë të lidhura ndërmjet operatorëve stivadore dhe APD, parimit të portit të hapur “common user port”, sipas të cilit duhet ti garantohet e drejta çdo përdoruesi të portit të përzgjedhë operatorin e tij; detyrimeve të Koncesionarit në zbatim të ligjit nr. 9121/2003, KK vlerësoi se mund të ndodhemi përballë një situatë urgjence të parashikuar në nenin 44 të ligjit nr. 9121/2003, për shkak të rrezikut të kryerjes së një dëmi të rëndë dhe të pariparueshëm për konkurrencën, pasi ka të ngjarë të ketë shkelje të nenit 9 (abuzimi me pozitën dominuese) të këtij ligji.

Bazuar sa më sipër, KK, me vendimin nr. 451, datë 28.02.2017 “Për marrjen e masave të përkohshme për rivendosjen e konkurrencës në tregun e shërbimit të ngarkim-shkarkimit dhe aktivitetet e lidhura me to për mallrat rifuxho në Terminalin Lindor të Portit të Durrësit”, vendosi marrjen e masave të përkohshme ndaj ndërmarrjes “EMS APO”, si vijon:

Të zbatohet në mënyrë të menjëhershme detyrimin ligjor për ofrimin e shërbimit të ngarkim-shkarkimit dhe shërbimet e lidhura me to për të gjithë operatorët e licencuar stivadore që ushtrojnë veprimtarinë e tyre sipas licencës;

Të lejojë aksesin e operatorëve stivadore të licencuar në Terminalin Lindor për të kryer shërbimet ndaj klientëve;

“EMS APO” të vendosë në përdorim vinçat për të gjitha shoqëritë stivadore.

Masat e përkohshme merret për një periudhë kohore të caktuar deri në përfundim të hetimeve.

Në përfundim të hetimit paraprak KK konkludoi se: sjellja e ndërmarrjes me pozitë dominuese EMS APO, duke vendosur kushte të padrejta tregtimi dhe refuzuar aksesin në facilitetet e infrastrukturës që disponon ndaj ndërmarrjeve stivadore, në zbatim të nenit 9, pika 2, gërma a) dhe c) të ligjit nr. 9121/2003, mund të përbëjë abuzim me pozitën dominuese, me pasoja të rënda për konkurrencën në treg.

KK, me vendimin nr. 477, datë 12.10.2017 vendosi hapjen e procedurës së hetimit të thelluar ndaj ndërmarrjes “EMS-Albanian Port Operator” SHPK, në tregun e shërbimit të ngarkim-shkarkimit dhe aktivitetet e lidhura me to, për mallrat rifuxho në Terminalin Lindor të Portit të Durrësit. Pas përfundimit të raportit të hetimit të thelluar nga Sekretariati, një kopje i është dërguar ndërmarrjes EMS APO. Pas konsultimit me dosjen e hetimit kjo ndërmarrje ka paraqitur prapësimet e saj me shkrim lidhur me konkluzionet e raportit dhe është paraqitur në seancë dëgjimore sipas nenit 39 të ligjit nr. 9121/2003.

Gjithashtu një kopje e Raportit të hetimit të thelluar iu dërgua MIE dhe APD, për tu shprehur lidhur me konkluzionet e raportit. APD depozitoi vlerësimin e saj me shkrim dhe u paraqit në seancën dëgjimore të realizuar nga KK, ndërsa MIE, me gjithë kërkesat e vazhdueshme, nuk ka bashkëpunuar me AK dhe nuk ka marrë pjesë në seancë dëgjimore.

Për këtë arsye, AK, me shkresën nr.64 prot., datë 30.01.2018 i është drejtuar Komisionit të Ekonomisë dhe Financave dhe Komisionit të Veprimtarisë Prodhuese, Tregtisë dhe Mjedisit, në Kuvendin e Shqipërisë, duke depozituar Raportin Hetimor të realizuar për këtë çështje për realizimin e një seancë dëgjimore me MIE si organi rregullator në tregun përkatës. Në përfundim të kësaj procedure, KK do të shprehet me vendim përfundimtar në lidhje me rivendosjen e konkurrencës dhe rregullimin e këtij tregu.

# AK përballë proçeseve gjyqësore

## Çështje për gjykim nga Gjykata Administrative e Shkallës së Parë Tiranë

Çështja administrative me paditës ndërmarrjen "EMS APO", të paditur AK, me objekt: "Shfuqizimi i vendimit të KK nr. 451, datë 28.02.2017 "Për marrjen e masave të përkohshme për rivendosjen e konkurrencës në tregun e shërbimit të ngarkim-shkarkimit dhe aktivitet e lidhura me to për mallrat rifuxho në Terminalin Lindor të Portit të Durrësit".

Vendimi i KK, është lënë në fuqi nga Gjykata Administrative e Shkallës së Parë, me vendimin nr. 80-2017-3056, datë 10.07.2017, ku ka vendosur: Rrëzimin e kërkesë-padisë dhe lënien në fuqi të vendimit të AK.

Kundër këtij vendimi, nga ana e ndërmarrjes është kryer ankimi në Gjykatën Administrative të Apelit, Tiranë.


## Çështje për gjykim nga Gjykata Administrative e Apelit

Çështja administrative me paditës ndërmarrjen "AMC" Sha, i paditur AK, me objekt: Pavlefshmëria e vendimit të KK nr. 59, datë 09.11.2007 "Për abuzim me pozitën dominuese në tregun e telefonisë së lëvizshme të shoqërive "AMC" Sha dhe Vodafone Albania Sha". Gjykata e Rrethit Gjyqësor Tiranë, në lidhje me këtë çështje, ka vendosur rrëzimin e padisë, duke konfirmuar ligjshmërinë e vendimit të KK nr. 59, datë 09.11.2007. Kundër këtij vendimi pala paditëse "AMC" Sha, paraqiti ankimi pranë Gjykatës së Apelit Tiranë, e cila pas shqyrtimit vendosi lënien në fuqi të Vendimit të Gjykatës së Rrethit Gjyqësor, Tiranë. Kundër këtij vendimi "AMC" paraqiti rekurs pranë Gjykatës së Lartë, e cila pasi e shqyrtoi, vendosi kthimin për rigjykim të kësaj çështjeje pranë Gjykatës Administrative të Apelit, Tiranë dhe jemi në zhvillim të seancave të gjykimit ku ka vijuar procedura e caktimit të ekspertit ekonometrik.

## Çështje për gjykim nga Kolegji Administrativ i Gjykatës së Lartë

Çështja administrative me paditës ndërmarrjen "Ultra Motors" Shpk, i paditur AK, me objekt shfuqizimi i vendimit të KK nr. 154, datë 01.10.2010 "Për ndalimin e marrëveshjes midis ndërmarrjeve "Classic" Shpk, "Hyundai Auto Albania" Shpk, "Noti" Shpk dhe "Ultra Motors" Shpk dhe vendosje gjobe ndaj tyre për kufizim të konkurrencës në tregun e prokurimeve të automjeteve të reja", lidhur me gjobën për pjesëmarrje në marrëveshjen e ndaluar në oferta.

Çështja ndodhet për shqyrtim në Dhomën e Këshillimit të Kolegjit Administrativ të Gjykatës së Lartë dhe jemi në pritje të datës së gjykimit.



## Ekzekutimi i vendimeve të Komisionit të Konkurrencës

Në vitin 2017, veprimtaria e AK ka pasur në fokus edhe gjetjen e rrugëve për të bërë të mundur ekzekutimin e vendimeve të marra në vite nga KK.

Rezultojnë, se janë 13 vendimmarrje të Komisionit të Konkurrencës, të shoqëruara me gjobat respektive të cilat, duhet të ekzekutohen, për faktin se në zbatim të nenit 80 të ligjit nr. 9121/2003, ato konsiderohen ispo jure tituj ekzekutivë.

Këto vendime, në vite rezultojnë të paekzekutura. Kështu me shkresën nr. 401, datë 06.10.2017, AK i është drejtuar Ministrisë së Drejtësisë dhe Drejtorisë së Përgjithshme të Përmbarrimit, por edhe pas kësaj korrespondence vendimet nuk janë ekzekutuar.

Në këto rrethana, AK ka kërkuar nga DPP, kalimin e këtyre vendimeve për ekzekutim përmbarrimit privatë. DPP ka refuzuar kalimin e ekzekutimit të këtyre vendimeve tek përmbarruesit privat me justifikimin se kjo nuk është e mundur. Jemi në pritje të vënies në ekzekutim të këtyre vendimeve.

# Advokacia e Konkurrencës

## Konferenca Ndërkombëtare e Konkurrencës

AK, në bashkëpunim me Organizatën e Kombeve të Bashkuara për Zhvillim (UNDP), zhvilloi në datat 11-12 dhjetor 2017 në hotel "Tirana International", në kuadër të ditës ndërkombëtare të konkurrencës, Konferencën Ndërkombëtare me temë: "13 vjet eksperiencë në politikën e konkurrencës në Shqipëri: aspekte të ligjit, ekonomisë dhe biznesit", ku merrnin pjesë të ftuar nga autoritetet homologe në Evropë dhe SHBA, përfaqësues nga

organizmat ndërkombëtare: BE, OECD, UNCTAD, ECS etj., përfaqësues të institucioneve shtetërore dhe enteve rregullatore në Shqipëri.


Nga lektorët e huaj, të ftuar në këtë aktivitet u vu theksi se ajo që duhet të përmbushet në funksion të konkurrencës është ekzistenca e tregjeve bazuar në zbatimin e rregullave të ligjit, i cili do të sigurojë: krijimin dhe ruajtjen e tregjeve të lira, gjykata të pavarura dhe mbrojtjen e drejtave pronësore, që do të tërheqin investimet private, të huaja dhe vendore dhe që do të krijojnë vende të reja pune.



Në këtë aktivitet u diskutua veprimtaria e AK, si një institucion publik i pavarur, i cili ka hyrë në vitin e 13 të veprimtarisë së tij në fokus të të cilës ka : Nxitjen dhe mbrojtjen e konkurrencës së lirë dhe efektive në treg, që i shërben mbi gjithçka interesave të konsumatorit, eficiencës së tregjeve si dhe prosperitetit ekonomik dhe social afatgjatë të vendit. Vendimmarrja e AK është përpjekur të vlerësojë të gjithë sektorët e ekonomisë shqiptare, duke u ndalur veçanërisht në sektorët më të ndjeshëm të ekonomisë, të tilla si: karburantet, gazi, telefonia celulare, tregu i sigurimeve, tregu bujqësor, sistemi bankar dhe produktet e tij, si dhe prokurimet publike.

Nga ana tjetër, liberalizimi ekonomik dhe reformat i shërbejnë: mbrojtjes së konsumatorit të dobët nga kartelet, mbrojtjes së fermerëve të vegjël dhe bizneseve nga abuzimet e blerësve dhe furnizuesve dominues dhe mbrojtjes së konsumatorit nga tarifat e larta.

Përballë sfidave, që nxjerr procesi i ardhshëm i antarësimit në BE, roli i Autoritetit të Konkurrencës, në një ekonomi gjithnjë e më shumë globale, rrit nevojën për rregulla dhe parime antitrust, në kuadër të një bashkëpunimi më të gjerë ndërkombëtar.



# Transparenca



## Tryezat e Rrumbullakta

Në lidhje me promovimin e kulturës dhe advokatinë e konkurrencës, AK, zhvilloi disa tryeza të rrumbullakta me komunitetin e biznesit.

AK, gjatë periudhës tetor-dhjetor 2017, organizoi 3 tryeza të rrumbullakëta, në qytetet e Elbasanit, Fierit dhe Durrësit, me temë “Kontributi i Autoritetit të Konkurrencës në zhvillimin e qëndrueshëm të bizneseve”, ku u paraqitën dy dokumente: (1) Programi i lehtësimit nga gjobat; (2) Programi i përputhshmërisë me rregullat e konkurrencës. Prezantimi i këtyre dokumenteve synoi ndërgjegjësimin e komunitetit të biznesit në respektimin e rregullave të konkurrencës, si dhe domosdoshmërinë e bashkëpunimit të tyre me AK.



# Bashkëpunimi ndërkombëtar

## Rrjeti Ndërkombëtar i Konkurrencës (ICN)



AK, është anëtare me të drejta të plota në ICN, që është rrjeti më i madh që përfshin pothuajse të gjitha autoritetet e konkurrencës në Evropë dhe botë, që nga viti 2004.

AK gjatë vitit 2017, ka ndërmarrë një rol më aktiv pranë ICN, duke u berë pjesë e grupeve të ndryshme të punës, përkatësisht: Grupi punës për avokacinë; Grupi punës për efektivitetin e autoritetit; Grupi punës për kartelet; Grupi punës për përqendrimet; Grupi punës për sjelljen e njëanshme në rastet e abuzimit të pozitës dominuese.

## Qendra Rajonale e Konkurrencës (OECD-GVH RCC)



Gjatë vitit 2017, Autoriteti i Konkurrencës vijoi bashkëpunimin me OECD-GVH RCC nëpërmjet trajnimeve të vazhdueshme që kjo qendër ofron për vendet e Europës qendrore, lindore dhe juglindore.

Si rezultat i bashkëpunimit të suksesshëm vitin e kaluar, për vitin 2018, OECD-GVH/ RCC, ka përzgjedhur Autoritetin Shqipëtar të Konkurrencës, si vendin pritës për të organizuar sëbashku në Tiranë, nga datat 19-21 qershor seminarin me temë “Për kontrollin e përqendrimeve”, ku do të të marrin pjesë përfaqësues nga vendet e rajonit dhe ekspertë ndërkombëtarë.

## Organizata për Bashkëpunimin Ekonomik dhe Zhvillimin (OECD)



AK është përfaqësuar në dy aktivitete të OECD, duke paraqitur pervojën shqiptare, si seminari “Përzgjedhja e sektorëve ose industrive prioritare për studimet e tregut”, i organizuar në mars 2017 dhe Forumi Global i Konkurrencës, i organizuar në dhjetor 2017.

## Observatori i Transportit për Evropën Jug-Lindore (SEETO)



AK angazhohet në mënyrë të vazhdueshme në aktivitetet e organizuara nga SEETO, duke trajtuar konkretisht aspekte të konkurrencës në sektorin e transportit në Shqipëri.

## Konferenca e Kombeve të Bashkuara për Tregti dhe Zhvillim (UNCTAD)



AK i kushton një rëndësi të madhe politikave të konkurrencës dhe ka bashkëpunuar me UNCTAD. Në 2017, në Gjenevë u organizua nga UNCTAD takimi i “Grupit Ndërqeveritar të Ekspertëve mbi Konkurrencën, Ligjin dhe Politikat”. Në këtë takim, Kryetari i AK mori pjesë si panelist, i ftuar në seksionin me temë: “Sfidat e regjimeve të kontrolleve të përqendrimeve për autoritetet e vogla dhe të reja të konkurrencës”.

## Sofia Competition Forum (SCF)



AK, si pjesë aktive e këtij forumi, për vitin 2017, ka marrë pjesë në forumin e 10 të SCF. AK ka publikuar tre artikuj për rastet e konkurrencës në Shqipëri, në buletin e përvitshëm të SCF, përkatësisht:

Programi i përputhshmërisë, bazuar në rregullat e konkurrencës;

Tregu i sigurimeve në Shqipëri;

Zgjidhja e mosmarrëveshjeve në lidhje patentat standarde të telekomunikacionit në Evropë.

## Komuniteti i Sekretariatit të Energjisë (ECS)



AK, gjatë vitit 2017, ka vijuar kooperimin me Sekretariatit të Energjisë nëpërmjet shkëmbimit të eksperiencave për tregun e energjisë në Shqipëri, si dhe pjesëmarrjes në disa evente.

Mbështetur në rekomandimet e Sekretariatit, KK nuk u shpreh me një vendimmarrje, për të përjashtuar “Marrëveshjen ndërmjet KESH-OSHEE për blerjen e energjisë elektrike për mbulimin e humbjeve në rrjetin e shpërndarjes, në kushtet e prurjeve të mëdha hidrike”. Qëndrimi i KK, u bazua në kuadrin e ri ligjor të miratuar, përkatësisht ligjin nr.43/2015 “Për sektorin e energjisë elektrike” dhe rregulloren “Për procedurën e blerjes së energjisë elektrike për mbulimin e humbjeve në rrjetin e transmetimit dhe shpërndarjes, për plotësimin e detyrimeve të shërbimit publik”, të miratuar nga Bordi i ERE.

# Integrimi evropian



Procesi integrit, përbën një nga prioritetet dhe sfidat e veprimtarisë së AK. Si një institucion lider për kapitullin e 8 “Politika e konkurrencës dhe liberalizimi”, AK, gjatë vitit 2017 ka përbushur misionin e tij, fokusuar në disa drejtime kryesore.

Në kuadër të Planit Kombëtar për Integrimin Evropian (PKIE) në terma afatmesëm, për vitet 2016-2020 për kapitullin 8 “Politika e Konkurrencës”, AK, në respektim të afateve kohore, ka realizuar përafrimin e legjisllacionit të konkurrencës me acquis të BE, përkatësisht dy akte

Rregullorja “Për kategoritë e marrëveshjeve të transferimit të teknologjisë”, miratuar me vendimin nr. 489, datë 20.12.2017 të KK;

Broshura Informuese “Programi i përputhshmërisë me rregullat e konkurrencës”.

Si lider dhe koordinator i kapitullit 8 “Politika e Konkurrencës”, që përbëhet nga tre komponentë: Konkurrenca, Ndihma Shtetërore dhe Liberalizimi. AK raporton në mënyrë periodike pranë MEPJ, si dhe pranë Komitetit i Stabilizim-Asociimit dhe Nënkomitetit për “Tregun e Brendshëm dhe Konkurrencën, të përfshirë mbrojtjen e konsumatorit dhe shëndetit”.

Takimi i 9 i nënkomitetit BE-Shqipëri për “Tregun e Brendshëm dhe Konkurrencën u prezantua në muajin tetor 2017. Në këtë takim, u raportua puna mbi aktivitetin AK, për tregjet e monitoruara, procedurat hetimore dhe vlerësimet e kryera nga AK, rritjen e kulturës dhe advokacisë së konkurrencës dhe ndërmarrja e nismave të reja ligjore, në drejtim të mbrojtjes së konkurrencës së lirë dhe efektive në treg.

KE rekomandoi që AK duhet të përdorë politikën e vendosjes së gjobave si një politikë efektive parandaluese për të realizuar një zbatueshmëri më të fortë të ligjit për mbrojtjen e konkurrencës, politikë të cilën AK po e zbaton për vitin 2018.

Gjatë vitit 2017, si drejtues të Grupit Ndërinstitucional të Punës për Integrimin Evropian, nën drejtim të AK u mbajtën 10 takime institucionale, për çështjet të liberalizimit të tregut. Për vitin 2018, AK do të vazhdojë të jetë pjesë integrale e strukturës institucionale për procesin e anëtarësimit në BE.








# Kapacitete njerëzore

Gjatë vitit 2017, janë realizuar 24 trajnime jashtë vendit dhe 4 brenda vendit, ku është trajnuar një numër i konsiderueshëm prej 44 punonjësish të institucionit, ku një pjesë e punonjësve rezulton të jenë trajnuar më shumë se një herë.

Të gjitha trajnimet janë realizuar në kuadër të bashkëpunimit ndërkombëtar të AK me ICN, RCC OECD dhe brenda vendit, nga Shkolla e Administratës Publike, kryesisht lidhur me HRMIS-in dhe për hedhjen e pagesave në sistemin e përgjithshëm financiar.



## Prioritetet e AK për vitin 2018

---

①

AK, në përputhje me qëllimin e ligjit nr. 9121/2003, për një konkurrencë të lirë dhe efektive në treg, do të ketë si prioritetet të veprimtarisë së tij mbikëqyrjen dhe hetimin në tregjet me sensitive të ekonomisë shqiptare dhe me impakt të drejtpërdrejtë në interesat dhe mirëqenien e konsumatorit, përkatësisht: tregu i telekomunikacioneve, tregu i energjisë, tregu i hidrokarbureve, tregu financiar dhe i sigurimeve, si dhe tregu i agrobiznesit.

②

AK, në zbatim të nenit 69 të ligjit nr.9121/2003, do të forcojë bashkëpunimin me institucionet e administratës qendrore dhe vendore, lidhur me vlerësimin për çdo projekt-akt normativ, që në mënyrë të veçantë ka të bëjë me vendosjen e të drejtave ekskluzive ose të drejtave të veçanta, kufizimet sasiore për hyrje në treg dhe tregtimin dhe imponimin e praktikave të njëjta në çmime dhe kushtet e shitjes.

③

AK, në zbatim të nenit 70 të ligjit nr.9121/2003, do të bashkëpunojë me entet rregullatore, në kuadër të rolit të AK për rregullimin dhe reformën rregullatore, në sektorët e rregulluar.

### Përafrimi institucional me standardet dhe praktikat e BE-së

Gjatë vitit 2018 AK do të forcojë kapacitetet administrative nëpërmjet një shtese në strukturën organizative të AK, si dhe nëpërmjet trajnimeve sipas sektorëve, mbështetur edhe me projektet ku AK është përfitues, me qëllim rritjen e cilësisë së inspektimit, hartimit të raporteve, cilësisë së mbrojtës së vendimeve të komisionit në proceset gjyqësore etj..

AK do të vazhdojë të monitorojë rregullisht zbatimin e MSA, si pjesë përbërëse e saj në Kapitullin e 8 si dhe të PKIE, duke dhënë kontributin përkatës për takimin e Nënkomitetit të Tregut të Brendshëm dhe Konkurrencës.

AK, si përfitues i një projekti IPA II, me vlerë 700 000 euro, synon të forcojë kapacitetet institucionale.


AK do të jetë përfitues i një projekti me BERZH "Asistencë Teknike për AK - Rritje e Kapaciteteve, Hartim i Legjislacionit dhe Advokacia".

Në kuadër të TAEX, pritet të realizohet gjatë vitit 2018 forcimi i kapaciteteve të stafit, lidhur me analizat ligjore dhe analizat ekonomike në shqyrtimin e rasteve të konkurrencës.

Në kuadër të bashkëpunimit me UNCTAD, AK ka si objektiv të tij: realizimin e një projekti të përbashkët me MFE, "Competition and Consumer Protection Policy in Albania", ku parashikohet trajnimi i stafit të AK në lidhje me vlerësimin e të drejtave ekskluzive dhe të veçanta, vlerësimin e procedurave të prokurimit publik për marrëveshjet e ndaluara në oferta, vlerësimin gjatë procedurave të kontrollit të përqendrimeve, shkëmbime eksperiencash.

AK, në kuadër të bashkëpunimit ndërkombëtar, do të jetë institucioni pritës dhe organizues i një aktiviteti ndërkombëtar me pjesëmarrjen e anëtarëve të rrjetit rajonal OECD- GVH/RCC.

# Struktura e re e organizimit të AK



Informacioni dhe të dhënat e paraqitura në këtë dokument janë vetëm të një natyre treguese, me qëllim informimin e publikut rreth aktivitetit të Autoritetit të Konkurrencës.



AUTORITETI I  
KONKURRENCËS